

2 TIMODHY

Riown Wargahng Agweed Poale Yihr Timodhy

Rob Ke Nying Warga

Goan ka duohng yi riown wargahng Poal naa agweede yihr Timodhy beehda puohny wa ka nahge nyethiin kedea ngad kony yihr Poal. Gihn teeg yea keraahyo beehda guum. Timodhy apuohny kedea cwihnye aciihm ne mag rob kedea puohny ke nying Jeacuu Kriihjto beer mee ke nud cwihny. Kare nud umage puohny adiehr gihr Ciig Beer kedea lum Anweehd gihn acoon kedea uyuge tiihye wa ngad puohny maa ngad nyoadh lum Juog, giuh me yuge cang kii raahm kedea mahn ke nyoge mooge.

Timodhy atoohn ne cohng ke nying ka raaje kii ngo nea ree amade yi yug giuh beehd kedea peehm ke toohd me gihn me kony gene tooro, abea ge lyaahb wudh yaa lihng gen urwaahny gene.

Yihdh giuh ni cang e aber yihr Timodhy e kar kaa naa abeehd Poale maa gihn anaa acube yi cwihny yiiho gihre, teeg cwihny, guum maa raahm yi bahng.

Kaa Acaan Luube

Lum umodho 1:1-2

Muohj kahw kedea doohr 1:3-2:13

Atoohno 2:14-4:5

Beehd mar Poal ke ngude 4:6-18

Gug luube 4:19-22

1 ¹ A Poal e ne gweehd yihri, yih Timodhy a ge aohr Jeacuu Kriihjte neehn kaa agweehg Juoge ngo coon. A aohre ne teed lum Juog yihr nyoge kedea ne nyoadh ngo yihr gen kejea nea Jeacuu yiih gene yiiho, e boadh wahy me be gug yoad gene yoado. Boadh wahy gihn nweehd won keehd Jeacuu Kriihjto.

² Timodhy, warga gihn agweeda yihri bang gihn yih neehn nyethiin yeya maa anhyaara ke nying kaa ayihi lum Juog kii ngo. Beehn Juog Wuure kedea Jeacuu Kriihjto Ruohdho cub gene muuny mar gen kedea doohr mar gen yihri maa duu gene cwihny gen caahn rihi.

³ Juog koohre muohja muohjo ne naang ke bang dewaahr kedea decahngo. Juog gihr ge wura en ne wuora kedea a beehdo kaa dhe yooh me ne cohng me meehg cwihny Juog mihno riha. E naa gihn beehda ke cwihnya acielo. Ke nying nihn, e kwahya yihr Juog, e wiha be wul ne kwaj ke nyingi. ⁴ Piih wongi ge anaa awoj piny ge poohd para paro. Yih acana keraahyo, a daahd uniida yihn keehdo beere cwihnya naa yum. ⁵ Kwaad yiiho gihn ne yihri be wul yi wiha. Ngo uroomo keehd yiiho mar wongu ge cuohn ne Loaj kedea mar miihu ge cuohn ne Yunij. Ngo dhiila kaa ngahyo kejea yiiho gihri noono ree uwage.

Muuny Acub Juoge Yihr Timodhy

⁶ Ke nying kwaad yiiho gihn ayihi lum Jeacuu, e naa gihn bera ngo yihri kejea mag muuny Juog gihn ayoadi cahng anaa acuba cinga yi wihi. Cinga anaa acuba yi wihi ne dooj yihn kedea ne cub yihn yi tiihy kwaag yaa ayiiho. ⁷ Teeda teedo yihri kejea bar maalo ke tiihy nu, bang gihn Juog Wahy Juog acube yihro beere wo be tud. A teeda yihri kejea bar maalo ke tiihy nu bang gihn Juog wo amuoje ke Wahy Juog me wo be weehge tudo, abea Wahy Juog cub tee kedea nhyaro kedea dhe yoohn koar rogo.

⁸ Nea lum Juog ayiiho beer mee e wihi be laahy ne rob ke nying Jeacuu yihr nyoge kedea ne rob ngo kejea a beehda gomi. Yih kea tud nea yih ke maa neehn ka beehda kan yi thijin. Dhiil guum neehn mara ke nying Juog bang gihn Juog yih umuoje ke tee me guumi giuh me reje. ⁹ Anahg Juog e naa par ngo e keede ne boadh wahyo kedea ukwanye won ne tiihy tiihye. Giuh nu ge ayug Juoge yihro padh ke nying gihn maa tiihyo yihre, anahg ke nying gihn maa atage kedea ke dhe yoohn muuny mare. Muuny ngo acube yihro, ke nying Waahde Jeacuu Kriihjto. Acube yihro yi nihn umodho e maalo maa piny ge puud kuu acage. ¹⁰ Gihn maa anaa angahyo ke nying gihn atag Juoge ngo atooro. Abea, awaahn ni ngo anyoadhe yihro naa abeehn Jeacuu Kriihjto Ngad Boadh nyoge. Jeacuu, thoo ataaaje kedea unyoadhe beehdo me yea tooro thoo yihro ke dhe yoohn kitaab Juog. ¹¹ Ngahyi kejea lum Juog ke ngude e naa akwany an kedea uyuge an ne ngade me oohre ne rob ke nyinge kedea ne puohny Ciig Beer yihr nyoge cang. ¹² Ke nying tiihy akwany Juoge an yea, e naa gihn ayoadi giuh raahm rog. Abea keehd maano e wiha be laahy, bang gihn ngaa acub tiih yihra beehda ngaa me ngahya kedea ngo gaahna gaahno. Ngo angahya kejea giuh atiihya ge pahdh yi cwihnye cang, kedea ke nying giuh nu atiihya, a ukooge cahng uduu Jeacuu.

¹³ Dhe yoohn puohny maa athiir gihn alihngi banga ngo kea wii. Puohny yaai ke puohny maa athiir. Puohny nyoge ne cohng ke dhe yoohn me yiih gene Jeacuu Ngad boadh won unhyaare. ¹⁴ Wahy Juog gihn beehdo ke won yih ukonye ne mag luube giuh beey ge wii Juoge yi cingi.

¹⁵ Ngahyi kejea Piigeluj maa Ehrmojean kedea yaa yiiho giuh abeehno ke yoohn piny Aacya ge goohd oogo riha.

¹⁶ Abea Onecipoaruj gihn me beer atiihye yihra. Beehn Juoge dooje Onecipoaruj kedea yaa paare ke nying gihn beer e ayuge. A aliewe tiel me thoohd kedea umeehge aduuna ngahmo. Wiihe kuu alaahyo ne liew an keehd maa anaa yi thijin, ¹⁷ bang gihn kaa awahnhe ke geen Roama, e athubo ke daahd kara uwahdhe kaa ayoadi an. ¹⁸ Beehn Juoge

wiie giih me reje naa atiihy Onecipoaruje piny yihr ngo cahng ukihm Juoge nyoge. Ngahyi thiw kaa akonye an kii ngo kaa anaa yi geen Epicoj.

Ka Uguum Timodhy Giih Ajohr

2¹ Abea yih waahda, ngahm cwihnyi ke nying muuny Juog gihn nweehd won keehd Jeacuu Kriihjto. ² Luube giih anaa alihngi e ge roba robo nyum amahr nyoge puohny gen yihr nyoge me cwihny be diiw rog gen. Puohny gen yihr yaa cwihny be diiw rog gen ne baar gen wong maalo yihr nyoge.

Yih Umuoj Jeacuue Ke Tee Me Romi Guum Nyepinye

³ Deed cwihnyi ne guum giih raahm udoohngi ne ujaadya me kag ke nying Jeacuu Kriihjto neehn mara. ⁴ Wa maano nahgi ujaadya gih Jeacuu Kriihjto, wihi keá cahg ke cub ne tiihy giih wihi ngoom. Nea wihi cubi ne tiihy giih ungoom e giih adaahd ngaa akwany yihn yi jeaj gihre be rom rog gen ke tiihy yihri wa ka daahde. ⁵ Caahdhi kaa dhe yoohn loohng gih Juog beere gihn me beer yoadi yoado. Yi cohgo ke ngwee ngaa e ne cub gihn me beer yihre? Ngaa cohgi ke dhe yoohn loohng gihn arobe wale ngaa cohgi ke kar wihe maa atage? ⁶ Keehd yi puur. Ngaa en kuong kaj? Ngaa apuro umodho wale ngaa apuro dhe caahn? ⁷ Caadh yihdh ucaale giih roba yihri, beere Juog wihi yabe yabo unghahi yihdh gen.

⁸ Giih beeye ne puohnya ge ngahyi. A upuohnyo kejea Jeacuu Kriihjto en naa Ngad Boadh nyoge, kedea naa athowe e ngo ameehg Juoge cahro ne nyoadh ngo kejea Jeacuu Kriihjto beehda Waahd Juog. Thiw beehda dhaano bang gihn ngo beehda kwaar Deabid, kedea e naa Ruohdh. Kwaayi bange ke paro beere kwaad giih apuohnya yihri tee aduulo cub gene cubo yihri. ⁹ Raahm rog me duohng ne riha kedea tiena ge areehg ke gele ke nying giih nu apuohnyo wa ngaa maa atiihy awuohj me duohng. Abea keehd maano e lum Juog be rom ree ke reehgo ke gele wa mar dhaano ukar.

¹⁰ Abea ka me kweera ke giih raahm rog tooro nea raahm riha boadh wahy gihn cub Jeacuue yoad nyoge yoado, boadh wahy me meehg nyoge beehdo ka maa acielo yi Dhaahr Juog e amihr ke mihn cwihny me be gug ne naang.

¹¹ Ngahda beehda adiehr kejea,

“Nea wo uthoo keehd Jeacuu,
e wo ubeehdo keehde tiehd Paar Juog.

¹² Nea wo bar maalo ke guum ke nying Jeacuu
e wo unahg ruohdhe tiehd keehde.

Nea wo ukweer ke Jeacuu nea gihn me raaj apahdh wudho,
e ngo ukweer ke won thiw.

¹³ Nea yiiho gihro udoohng thiin
e yiiho mare be doohng thiin bang gihn ngo beehda ngaa me lume be waare.

Lume be waare bang gihn wo anhyaare kedea cwihnye ukonye won.”
Luub ni ge ne rob gihn maa athiir.

Liny Keehl Ke Yaa Puohny Giih Ucahb

¹⁴ Timodhy, lubo acielo moogo nud me teeda yihri. Wihi keá wul ne ber yihdh luub ni aroba yihri yihr nyoge kedea ngweel ngo piny yihr gen ke nying Juog kejea wudh gen kea cub gene ne peem luube me gih nying gen tooro, bang gihn peem kwaad luub nu wudh yaa ayiiho urahnyo nea ge lihng gene lihngo. ¹⁵ Yug rih beer mee beere Juog ka beehdi kii ngo nhyaare nhyaaro. Thiw bar maalo ke tiihy, wihi keá laahyo ne gihn tiihy. Puohny lubo maa adiehr ke dhe yooh me ne kew. ¹⁶⁻¹⁷ Yih kea piih ne rob ke nyoge me puohny giih maa toohd ke nying Juog. Bang gihn yaa peem giih toohd rog gen uyoahd gene e ge aay maahdh oogo yi lum Juog neehn ngaa me ree ne ler. Kwaad peehm gihn nu kahl ngwiilo rog yaa yiiho, ngwiilo muu uroomo kaa adhoohlo me dhiil wong dhaano piny: kwaad adhoohlo me be cig me nahg dhaano ke tuud. Yimoanoj maa Pihltuj ge ne kiin yaa puohny giih toohd. ¹⁸ Yaa nu ariow lum Juog abaj gene ulyaahb gene wudh yaa ayiiho. Kob gene kejea ngaa muu ucahg cahro tooro keehdo, bang gihn cahr nyoge wihe agug. Puohny gen noono kaa ayiih nyoge mooge lum Juog kii ngo yea ngo awuoj gene piih. ¹⁹ Abea toohd now, lum Juog tiene akeehd piny, gihn me lwag yea tooro. Juog yaae ge ngahye kedea ngaan koohbo kejea Juog ayiihe, dhiile tiihy giih me reje ke wiio.

²⁰ Paajo yea be tohr ke roohd maa agweed kedea muu kuu agweed. Roohd maa agweed ge kahl oogo nea weehno me wuor nud. Abea roohd kuu agweed ge ne tiihy nyoge ke gen yi nihn maa now. ²¹ Yaa ayiih Juog ge akweer ke giih puohny yaa toohd, ge ne room keehd roohd maa agweed ge ne cub yihr Juog ne tiihy giih beeye e daahd Juoge.

²² Kwaad giih reje e yug yaa reje cwihnyi keá cub rog gen, kedea nahge giih meehg yihn yug gihn me beer ge ne cubi cwihnyi ne tiihy gen. Nahgi ngad nhyaaro maa ayiih Juog. Beehd beer mee kedea e cwihnyi med keehd yaa anhyaar Juog kaa aduun gen cang. ²³ Doga kaa bero yihri kejea giih peehm me gih nying gen tooro, yih keá tiihyo ke gen. Bang gihn kwaad peehm me wa gihn nu nyoge keehg gene keehgo. Wii gen yihr yaa wudh gen tooro. ²⁴ Cub aduuni piny ne lahm kedea udoohngi ne ngad puohny me beer, bang gihn yaa tiihyo yihr Juog ge beehde e ge be weehr. Ge yaaj me beer ke nyoge kedea ge yaa puohny me be dhaahr ke puohny yaa arwaahnyo. ²⁵ Yaa cuung yi yoohni, rubi ke rob me ngey gene ngo ne cohg kejea nea wudh gen beer e Juog ge umeehge ngey gihn maa athiir, noono uyiih gene puohny gihri. ²⁶ Kaano, e wudh gen uyahbo ubodh gene yi boon atiihb ukeehg naa amag gen. Kaano e ge udoohng ne yaa tiihy giih gihn daahd Juoge.

Giih Uyug Rog Gen Cahng Moogo

3¹ Dhiil ngo ke ngahyo yih Timodhy kejea buu unahg tiihy me yoohd ne kwaag yaa ayiiho ke nying giih utiihy yaa reje nea beehn Jeacuu acahngo. ² Nyoge ge unahg yaa wahro me nhyaar ngiihny. Ge unahg yaa nhyaaam me koag ke giih amaahg. Ge unahg nyoge me dhahl Juog. Nyoge me dhahl weehg gen. Ge unahg nyoge me leej kwihy gene kedea ge be tud rih Juog. ³ Ge unahg nyoge me luube be wii gene piny, nyoge me nhyaaahro tooro yi cwihiy gen. Nyoge maa yaa waaj giih toohd me kwihj koar rog gen yihdh giih bal. Nyoge me koag ke giih bad, me maan gihn me beer. ⁴ Ge unahg nyoge maa yaa luom, me wudh gen be cub gene yi gihn tiihj. Nyoge maa yaa amaahg me nhyaar giih wuohbo. Ge unahg nyoge me nhyaar rog gen abea Juog be nhyaar gene. ⁵ Rog gen ayug gene wa nyoge me puoj Juog abea giih yug gene nyoadh ngo kejea tee Juog tooro rog gen. Timodhy, yih keá piih ka maa acielo ke kwaad yaa nu. ⁶ Yaa nu ge naa yaa leel rog gen yihdh wuud nyoge ne ci ne mag gom ke maahn me cwihiy gen bahw beere wudh gen log gene loo. Maahn maa atiihy thoohn awuohye me doonge. Thoohn giih atiihy gene ge ne meehg wudh gen loo noono udog gene ne tiihy giih reje ge puohny yaa ni yih gen. ⁷ Kwaad maahn nu ge daahd puohny me teed giih reje e nhyaar gene. Gihn nu e ne bahnge puohny maa athiir, e nyoadh lum Juog be yoad gene. ⁸ Yaa puohny giih toohd ge uroomo wa Janej maa Jambrej naa acub wudh gen ne dhaahr giih atiihy Moaje, ge nyoge me lum Juog arwaahnyo yih gen. ⁹ Gihn me dier nyoge ke nyinge tooro bang gihn ge beehda nyoge me wudh gen tooro kedea tooy wihj gih gen noono, ubeehn nyoge me thoohdhe ne ngeyo ka me cahng, toohd gen ungey wa gihn anaa atiihy ree rih Janej maa Jambrej.

¹⁰⁻¹¹ Abea Timodhy, yih be room ke yaa nu. Kaa apuohnya kii ngo, ngo ngahyi kedea kaa akaahna riha kii ngo, ngo ngahyi thiow. A beehdo e a ngaa maa amag gihn ayiiha ke cwihiy acielo. A beehdo e a ngaa maa anhyaar nyoge ke cwihiy me tar. Kaa aguuma giih reje naa atiihy nyoge riha ge ngahyi. Giih ajohr naa ayug nyoge riha ke bang wudh geedh Antiog maa Lijtera kedea Yikoohnya, ge ngahyi. Giih nu ge ayug riha, abea Juog e naa alwahg an oogo yihdh giih nu cang. ¹² Adiehr, kwaad ngaan daahd ubeehde ke beehd ngaa maa ayiih lum Juog naa anweehd ngo ke Jeacuu Ngad Boadh nyoge, e ngaa nu giih ajohr ge dhiile kaa yoado. ¹³ Abea mar yaa reje, kedea yaa ucahb ge ubar maalo ke raahyo me duohng udwaahng gene nyoge cang kedea udwaahng gene rog gen ke ngud gen. ¹⁴ Abea mari yih Timodhy, mag cwihiy teeg mee ungeehri yi lum Jeacuu ge alihiy yi dhog wan. Lum Jeacuu ayiihi ne cohg naa athiir bang gihn wan ke ngud wan ngo apuohny wane yihri. ¹⁵ Yih ke ngudi, giih agweed yi kitaab Juog ge angahyi ke coon e yih puud thiin. Luub agweed yi kitaab Juog ge naa ayab wongi kedea uyoadi boadh wahy naa ayiihi Jeacuu Kriihjto. ¹⁶ Kwaad luub agweed yi kitaab Juog ge beeye bang gihn Juog ke ngude e naa meehg gen gweedo. Kitaab Juog beer bang puohny gihn maa athiir yihro kedea nyoadh gihn me raaj yi tiihyo, kitaab Juog e ne yug won teeg beere giih beeye tiihyo tiihyo. ¹⁷ Noono e ngaa tiihy tiihy Juog gihn me riehy yihre ke tiihyo tooro bang gihn ree agwiire beer mee kedea gihn me daag yih tooro.

Lum Arob Yih Timodhy

4¹ Gihn me tiihy e man cuba yihri. Juog kedea Jeacuu Kriihjto Ruohdh, ge naa cuude giih cuba gihn tiihy nyum gen. Jeacuu beehda cuud yi tiihy cuba yihri bang gihn unahg en e nuu ukihm nyoge cang cahng ubeehne ne beehd yi Dhaahre ke yaae. ² Beehdi e rihi agwiiri ne puohny lum Juog maa adiehr yih nyoge. Dhiil ngo ke puohnyo yih gen keehd me toor cwihiy gene lihng giih puohny ni. Cohg wudh yaai kedea cuow gen nea ge awaahj. Gihn beer e dhiil gene ke tiihyo rob ngo yih gen. Yih keá dhaahr ne puohny lum Juog yih gen. ³ Tihiy giih nu bang gihn cahng ukweer nyoge mooge ke lihng puohny gihn rob athiir yihdh luub Juog ngo ubeehn. Noono udoohng gene e ge cej yaa puohny me puohny kwaad giih daahd gene ke lihngo, giih me be nhyaar Juoge. ⁴ Ge ukweer ke lihng puohny maa adiehr kedea ucub gene wudh gen ne lihng giih maa puoge. ⁵ Teeda teedo yihri thiow kejea mag cwihiy ubahnge giih me reje be yugi. Nahgi ngad guum, puohny Ciig Beer ge rubo ke nying Jeacuu yih nyoge. Yi tiihy noono tiihy yih Juog, tiihy kwaad gihn romi ke tiihyo utoor gihn me wii piny.

Poal Kea E Cahng Ke thoo

⁶ Giih ni ge aroba yihri bang gihn wahya ge awiia yih Juog maa nihna ge athum wihi piny. ⁷ Abea keehd me thowa, e cwihiy med bang gihn giih me teeg yihdh gen acaara kedea lum Juog amaga teeg mee. A rom yuohmo arumo bang gihn tiihya ngo awahdh guge. ⁸ Koog gihra ngo akan. Koog gihn cub Jeacuu e ngaa ngahy lug yihra Cahng Lug. Ngo ucub yihra kedea yih yaa abuhj ke koar cahng duu Jeacuu.

⁹ Cej dhe yooh me laari beehn banga piow piow. ¹⁰ Demaj ngaa acub wihe rog giih upiny kan akweer ke beehdo banga. Ngo a'aay ucea geen Thecaaloanika. Kreajen thiow a'aay. Ngo ne Galaadya, kedea Tihtuj aci Dalmaacya.

¹¹ Luka e ne ne banga kan cog. Kuung Maarko, keá wii piny. Beehni keehde tiehd beere a konye konyo ke tiihj.

¹² Tiicuhj ngo tooro thiow bang ngo aohra Epicoj. ¹³ Nea yih ubeehno, kea kuung waaro gih koohyo gihn anaa awiia Troaj bang Kaarpuj. Kuung kitaabe giiha keehd yih tiehd, kitaab gihn ngahye abahj ke deehd keá wii piny.

¹⁴ Alekjander ngad thaahdho gihn me raaj atiihye riha. Gihn ngo unahg Juog e nuu ucoal ngo wa kaano atiihye ngo riha. ¹⁵ Yih ke ngudi, koar rihi beer mee utoor gihn me raaj me tiihye rihi. Koar rihi bang gihn ngo ngaa me raany puohny gihro.

¹⁶ Bekihd ngaa maa anaa acung ke an cahng athuba ke goony nguda nyum lug. Nyoge cang ge agoohd oogo riha. Beehn Juoge wiie gihn nu piny yih gen. ¹⁷ Abea Juog acungo ke an ucube tee yihra beere Ciig Beer roma kaa puohnyo kedea ubeehn yaa padh Judea urom gene ngo ke lihngo. Juog a alwahge oogo yi dhe nguu. ¹⁸ Noono e ngo

3:1 1Tim 4:1; 2Pii 3:3; 1Jon 2:18; Juud 18 **3:2-4** Gal 5:19-21 **3:5** Mat 7:15, 21; Rom 2:19-20; Tii 1:16 **3:6** Tii 1:11 **3:8** 1Tim 6:4-5
3:10 Rom 16:24; 1Tim 1:5 **3:11** Tihiy 13:50; 14:5, 19; Guum giih reje: 2Kor 11:23-29 **3:12** Mat 16:24; Jon 15:20; Tihiy 14:22; 1Th 3:3
3:14 2:2; 1Tim 1:10 **3:15-16** Jon 5:39; Rom 15:4; 1Tim 4:13; 2Pii 1:21 **3:17** 2:21 **4:1** Tihiy 10:42; 2Kor 5:10; 1Pii 4:5 **4:2** Tihiy 20:20, 31; Tii 1:13 **4:3** 1Tim 1:10; 4:1 **4:4** 1Tim 1:4 **4:6** Pihp 2:17; 2Pii 1:14 **4:7-8** 1Kor 9:24-25; Pihp 3:12-14; 1Tim 1:18
4:10 Pihp 2:21; Demaj: Klo 4:14; Pihl 24; 1Jon 2:15; Tihtuj: 2Kor 2:13 **4:11** Luka: Klo 4:14; Maarko: Klo 4:10 **4:12** Tiicuhj: Klo 4:7-8
4:13 Tihiy 20:6 **4:14** Mat 16:27; Alekjander: 1Tim 1:20 **4:16** 1:15 **4:17** Tihiy 1:8; 23:11 **4:18** 2Kor 1:10; Pihp 1:19-20

gaahna gaahno kejea Juog a ukonye thiw yihdh giij me reje ge poohd ne wong maalo uwahdhe ka ukedhe an Maalo yi Dhaahre. Puoja Juog ke nihn ke nihn. E noono.

¹⁹Maahdh Prijkiila kede a Akwiila, maa yaa beed paar Onecipoaruj. ²⁰Erajtuj adoohng Korindh, kede a Troapihmuj awiia Mileatuj bang giin ngo anaa atwaany. ²¹Deed cwihnyi udhiili beehno e ruudo poohd kuu athubo. Yih amaahdh ge Yubuluj, kede a Puuden, maa Linuj kede a Klaawdyae. Yaa ayiiho cang yih amaahdh gene. ²²Yih ukaahn Juoge ke yoohm rihi kede a beehn Juoge ucube muunye yihri.